



Svjetlo znanja i stvaralaštva: 4. Festival stvaralaštva "ANITA SAVATOVIĆ"

4. Festival stvaralaštva "Anita Savatović" okupio je nadarene i talentovane učenike i nastavnike, spajajući znanje, kreativnost i zajedništvo kroz radionice, nauku, umjetnost i sport.



Četvrti Festival stvaralaštva „ANITA SAVATOVIĆ“, održan tokom novembra u Katoličkom školskom centru, i ove je godine spojio znanje, kreativnost, nauku, umjetnost i pedagoško zajedništvo.

Kroz niz pažljivo osmišljenih aktivnosti, radionica i događaja, učenici, nastavnici i stručni suradnici stvarali su prostor u kojem radoznalost i stvaralački duh postali pokretačka snaga.

Festival je otvoren radionicom „Čarolija polarnog svijeta“, kroz koju su učenici istraživali život na Arktiku i Antarktiku, prilagodbe organizama, dinamiku klimatskih promjena i geografske specifičnosti polarnih područja.

Praktične aktivnosti, eksperimenti i vizualni materijali pretvorili su učenje u pravi doživljaj. Ove godine, kao gosti izlagači, učestvovali su i učenici iz OŠ „Jovan Dučić“ pod mentorstvom prof. Slavena Filipovića. Oni su predstavili organizme bentosa u hladnim izvorima kao izvanrednu imitaciju toka rijeke Vrbanje. Nadamo se da je naša čarolija polarnog svijeta ostavila lijep utisak na posjetitelje festivala.

Sportski segment festivala obuhvatio je tematsku večer „Hokej i klizanje“, gdje su učenici imali priliku vidjeti izložbu sportske opreme i rekvizita, okušati se u vještinama hokeja i naučili više o zimskim sportovima.

Program je unio dinamiku i timski duh, podsjetivši na važnost igre i kretanja.

Umjetnički dio festivala predstavila je plesna predstava „Simfonija svjetla i sjene“, izvedena u Domu omladine od strane školske plesne sekcije. Kroz muziku, pokret i riječ prikazani su unutrašnji sukobi čovjeka – borba svjetla i tame, suprotstavljenih emocija i misli. Publika je bila oduševljena emotivnim i zrelim scenskim nastupom učenika.

Završni dan festivala bio je posvećen istraživanju i praktičnom radu, a posebno je istaknuta radionica iz fizike „Pogled ka kosmosu kroz magnetno polje“, u kojoj su učenici kroz eksperimente i demonstracije istraživali magnetna polja i njihove efekte u svemirskim fenomenima. Školski hol pretvoren je u svjetlosnu laboratoriju, gdje su vizualni prikazi i interaktivni eksponati omogućili neposredno iskustvo fizikalnih zakona, potičući radoznalost i kreativnost.

U okviru festivala organizirane su i radionice za stručni razvoj nastavnika. Radionica „Iskre znanja: pitanja koja otvaraju put“ usmjerena je na razvoj kritičkog mišljenja i poticanje aktivnog učenja kroz osmišljavanje poticajnih pitanja. Pedagoška i psihološka radionica „Polarne iskrice i raspoloženje“ istraživala je utjecaj emocija i motivacije na proces učenja i kreativno izražavanje, naglašavajući važnost emocionalne inteligencije i pozitivne atmosfere u učionici i van nje.

Festival stvaralaštva „Anita Savatović“, bogat brojnim aktivnostima usmjerenim na razvoj divergentnog mišljenja, potvrđuje da ideje rastu kada ih zajednički negujemo, a učenicima pružimo priliku da budu i stvaraoci i istraživači.

Sve ideje i programski sadržaji festivala autorski su osmislili članovi Tima za NiT (Tim za podršku nadarenim i talentiranim): Tanja Marić, Jelena Popović, Sanda Bjelajac, Andreana Kovačević Ćurić, Aleksandra Veselinović i Aleksandra Arsenijević–Puhalo.

Srdačno se zahvaljujemo svim profesorima naše škole, kao i nastavnicima banjalučkih osnovnih škola, čija su volja i entuzijazam omogućili da veliki broj učenika posjeti i uživa u ovom festivalu.

Tags

Istraživanje i stvaranje

Igra i rad

Umjetnost i nauka

nadareni i talentovani

Collections

Inspiriraj druge

Objava